



Basler Dybli

Duubeschlag

2022
~~2021~~
~~2020~~

Fasnacht 2020

Yynää, duureloo, uuseloo

Mikro – nennt me Stiggeli
vo Plastigg in Partiggeli
ob legal, ob illegal
global, zentral und radikal
s'gitt sy in jedem Potential
au wenn me weiss, es isch e Qual
und jede weiss, es isch fatal
um nit z'saage, e Skandal
findsch sy international
in jeder Form und jeder Zahl
kurz s'gitt sy aifach – yberall !
zerscht emool – dasch bsunders haarig
findsch sy bald in jedere Naarig
siggs e Gyggeli, e Fisch
vo lutter Blastigg seesch nimm, was es isch
s kunnt blastiggverpaggd uss dr Blastiggugge
und wenn de's denn duesch aabeschlugge
no duesch die Partiggeli grad verdrugge
denn in jedem Bröggeli – au im glainschte Schöggeli
hetts immer Mikro-Möggeli
jetz mien mer nomool zum Titel ko
ynää, duureloo und uuseloo
bisch nit akademisch – und kasch's nit verstoo
mit de d'Partiggeli goot das esoo:
de nimmsch sy yy,- kausch sy e glii
denn losch sy duur dy Schnuure duure
und hesch gnueg dervoo, no losch sy goo
no kunnt e Viech und streggt sich dernoo
und am Schluss stoot dr Mensch und frisst wieder dervoo.....
gnau soo isch das mit yynää, duureloo und uuseloo
Mikroblastigg – wo kunnt das häär
do froggsch dy am beschte, wärel i wär
hett ächtsch emool in schwache Stunde
dä ganzi Blastiggmischte erfunde ?
wär isch zschuld an däm elände Blastigg-Brunn
sicher stuunsch – es isch e kain vo uns
uss Pflanzesaft und Birkerinde
dien d Neandertaler e Gummi erfinde
en Art e Kautschuk, im Bestrabe
ihri Wärkzyyg zämmezgläabe
denn seesch nach joorhundertelangem Strabe
e baar Forscher im siebte Himmel schwäabe
und d Geburt vome neye Kunststoff erläabe
es isch e Substanz – hart wie ne Moore
und so sait me - sygi dr Blastigg geboore...
in däa neyi Stoff hett me denn vyyl z vyyl Verdraue
und hett au alles druss afoo baue
Blastigg dert – Blastigg doo – ohni Blastigg ka's nitgoo
und dr allerglainschti Dail dervoo
isch sitthäär als Mikroblastigg do !
dä losst me in ainere Rueh lo starte
und offebar ka me's kuum erwarte
dä kennezleere uff alli Arte
mikro-mässig schluggt jede, ohni s z mergge, dasch s Harte
jedi Wuche e ganzi Blastigg-Karte
so gosch scho mikro-mässig y
aber hitt isch halt yberall Blastigg derby
fascht kai Gmies liggt me unverpaggd umme
um alles wigglet me Blastigg drum umme
jedes Hefkli au und jedi Zyttig
kunnt blastiggverpaggd vo Mändig bis Fryttig
und derzue derfsch au immer no erwarte
e Hampfle Prospäggd als Blastigg-Schwarte
wieso muess me dä Mischte denn no blastifiziere
dä kennt me jo grad diräggd kompostiere
was mer immer mache, wo mer immer sinn
s hett dusse und dinne Partiggeli drin
in dr Luft und im Rääge – ohni jedi Schoonig
au im Birchermiesli und Bienehoonig
und findsch sy bym Aesse aimool grad noonig
no sinn sy im Dessert drin als Beloonig
so kunnt sooz'saage duur d'Hinterdyyre
immer igend e Mikropartiggeli fyre
Die ich rief, die Blastigg-Gaischter
däane wird y jetz nimm Maischter
denn langsam fliege Partiggeli
mit em Wind no wyter e Stiggeli
in Boode, ins Wasser, oder s frisst sy e Dier
und schynt's haigs au scho Partiggel im Bier
vom Dier kunnts ybers Aesse zrugge
so entstoot en Art e Blastiggbrugge
und kunnsch mikromässig under Drugg
via Grundwasser goots in Rhy und gly
ins Meer – wo kennts au anderscht sy
duet me s'richtig Entsorge immer verduudle
seesch immer mee Blastigg in Ozean spruudle
pro Quadratmeter zellt me dert – gar nit gail
yber zwanzidausig Blastiggdail
und in däm wältwytte Blastigguffe
wärde irgendwann emool alli versuffe
wo aber wottscht denn nundefaane
mit all däm Mikroplastigg aane
he - vor fuffzig Joor do isch me doch gstrandet
und s'erscht Mool by dr Frau Luna glandet
sitthär weiss me, dass dert kaine woont
jä, denn schiessed dä Blastigg doch uff e Mond !
In vyle Sache hett d' Menschhait so komischi Sitte
und hett sich au sälber scho ynegritte
au an all däm Mikroblastigg-Kult
simmmer zum greeschte Dail sälber zschuld
me wott alles besser und vo allem mee
dass das au Noodail bringt, will me nit gsee
dä Blastigg losst au s Klima nit loos
und isch dr Mischte denn gfaare, isch s Gjoomer gross
yberall hetts Blastigg, s blybt kaim verborge
muesch im Lade ebbbis go bsorge,
dänggg scho im Glaine an s Entsorge
bruuchsch kai Blastiggsagg umsverworge
strigg der sälber e Däschli zum alles z'versorge
aber muesch der vorhär ganz sicher sy, es sey
d'Wulle wo drfyr kauft hesch, uff jede Fall au **mikroblastigg-frei!**

Und wenn de sälber noonig gnueg hesch voo däm Mikroblastigg,
noo goosch an d'Usstellig vo de Lampe bym Münster
und vo de Requisite by der Kasärne
(Mäntig zoobe bis Mittwoch demorge)